



Factum,

Pour Dame Ysabeau de Chassignes, deffenderesse.

Contre le Sieur Vicomte d'Uza, demandeur.



E demandeur a cy deuant pourfuiuy par-
deuant le Seneschal de Guienne ou son
Lientenant que la deffenderesse fust con-
demnee se desister & despartir des terres
de Salles, Belin & Beliet, & luy en laisser
la possession viuide & vacuë suyuant cer-
taines lettres royaux qu'il auoit obte-
nuës: Et en ceste poursuite est interuenu
sentence, dont la deffenderesse auoit ap-
pellé: Cest appel euoqué & renuoyé au Par-
lement de Bre-
tagne où il y a eu arrest le 12. Aueil 1595. par lequel sans auoir es-
gard à d'aut res lettres du 3. Septembre 1594. que le demandeur
auoit incidemment obtenuës, l'appel & ce dont auoit esté ap-
pellé ont esté mis au neât, & les parties hors de cour & de pro-
cez sans despens.

Contre cest arrest ils'est pourueu par lettres en forme de re-
queste ciuille, desquelles par autre arrest du 11. Iuillet 1596. il a
esté debouté & condamné aux despens & en l'amande.

Derechef il s'est pourueu par autres lettres en forme de re-
queste ciuille pour estre restitué contre cest arrest, & a obtenu
lettres pour euocquer l'instance & la renuoyer au Conseil, ce
que la deffenderesse ayant empesché, sur cest empeschement,
& mesmes sur ce qu'elle soustenoit que par l'ordonnance, les
requestes ciuilles deuoient estre iugees par les mesmes Iuges, le



demandeur auroit présenté requeste aux fins que l'arrest fust cassé comme nul; & sur ce obtenu autre arrest au Conseil Priué le 30. du mois de Decembre 1598. par lequel sans auoir esgard aux lettres de requeste ciuile qu'il auoit obtenues les parties sont renuoyées au Conseil pour leur faire droit sur la pretendue nullité.

Depuis il y a eu reiglement à escrire & produire en la qualité duquel le demandeur a fait mettre l'instance des lettres en forme de requeste ciuile, & depuis il a obtenu des lettres d'ampliation sur lesquelles les parties ont pareillement esté appointées à escrire & produire: De sorte qu'il y a deux principales difficultez à iuger entre les parties.

L'une s'il est raisonnable de iuger encores vn coup les derniers lettres en forme de requeste ciuile & les lettres d'ampliation d'icelle.

Et l'autre si le deffendeur est receuable & bien fondé à demander par la voye de nullité que l'arrest donné au Parlement de Bretagne le 11. iour de Iuillet 1596. soit cassé.

Sur la premiere la deffenderesse dit en peu de mots, que par l'arrest donné au Conseil priué à la requeste & poursuite du demandeur, il est en effect deboutté de ses lettres royaux en forme de requeste ciuile, d'autant que sans y auoir esgard il a esté renuoyé sur la simple pretendue nullité: Il s'ensuit donc qu'il n'est pas raisonnable de les iuger encores vn coup.

L'argument de la deffenderesse pour empescher l'euocatiō, estoit celuy lequel a esté remarqué, que la requeste ciuile ne pourra estre iugée que par les mesmes Iuges: Sur ce le Roy & Messieurs de son Cōseil ont estimé raisonnable de l'en debouter, & de luy laisser la seule voye de pretendue nullité, que luy mesmes ayant poursuivy & obtenu cest arrest, il ne le peut impugner, & partant de vouloir que les lettres de requeste ciuile ayant esté iugées par iceluy, soient iugées encores vn coup, il ne seroit pas raisonnable.

Par la mesme raison les lettres d'ampliation ne sont en sorte quelconque receuables, d'autant qu'elles sont accessoires en l'instance principale de requeste ciuile, laquelle estant iu-

gee l'accessoire s'en va par vn mesme moyen, & ne peut estre receu.

Quand les lettres de requeste ciuile seroient encores à iuger & les parties en tel estat qu'elles estoient auparauant l'arrest du mois de Decembre dernier donné au Conseil Priué: Quand dis ie elles seroiēt entieres, que non, il y a vne fin de non receuoir pertinente, que le demandeur en auoit obtenu d'autres, desquelles par l'arrest du 11. Iuillet 1596. il auoit esté debouté, & que apres vne premiere requeste ciuile, la seconde ne peut ny ne doit estre receuë.

Il en a vne autre pertinente, que l'arrest du mois de Iuillet 1596. & interuenu sur les productions des parties avec telle connoissance de cause, que le demandeur ne sçauroit dire qu'il y ait eu aucun dol, surprise, precipitation, ny autre ouuerture quelconque pour se faire restituër contre l'arrest.

Il accuse les Iuges, comme en ayant recuzé trois, sçauoir, Monsieur de Ris premier Presidēt, Messieurs Hubi & Tituyau Conseillers: mais il ny a point de preuue au procez qu'il les ait recusez, sinon par vne simple coppie non signee de requeste, laquelle ne faict point de foy.

Quand elle seroit en forme autentique, elle contient que sur icelle Messieurs du Parlement de Bretaigne ont mis NEANT. & par ce moyen iugé les recusations comme impertinentes, s'ensuit donc que ayant esté iugees, le demandeur ne peut faire estat d'aucune recusation.

Et quand elles seroient à iuger, la seule lecture iustifie qu'elles sont impertinentes, & d'ailleurs supposees: tant y a que ayant esté iugé par l'arrest, que le demandeur mesmes pretend estre escrit au pied de la requeste dont il produit la coppie, ce moyen est impertinent contre l'arrest du mois de Iuillet 1596.

Pour vn autre moyen de requeste ciuile le demandeur propose qu'il y a eu de la precipitation au iugement du procez iugé par l'arrest du mois de Iuillet 1596. mais les pieces iustifient le contraire, qu'il est interuenu sur les productions des parties: *Adco* que encores aujourdhuy le demandeur n'apporte rien sinon ce qui a esté veu & iugé par Messieurs du Parlement

de Bretagne.

Par des requestes que luy mesmes a cōmuniquees, presentes au mois de Iuin 1596. Il a demandé la coppie du plaidoyé que le deffendeur auoit fourny, laquelle luy a esté baillee, s'il represente toutes les pieces, le Conseil verra qu'il y a respondu tout ce qu'il a voulu, & qu'il auoit eu assez de temps pour cest effect, tant depuis que au parauant qu'il en eust la coppie, d'autant qu'il en auoit ouy les moyens lors que la requeste ciuile fust plaidee & reglee en l'audiance.

Et dauantage le Conseil verra par le plaidoyé de la deffenderesse qu'elle n'a rien dit que ce qui estoit auparauant au proces, sinon qu'elle a respondu sommairement aux moyens que le demandeur auoit fait escrire en sa requeste ciuile.

Le demandeur apporte vn autre moyen, fondé sur vn acte faict entre son solliciteur & son Procureur, lequel se pleignoit que ayant présenté vne requeste, laquelle il produit, elle n'auoit pas esté respondue; & au contraire Messieurs du Parlemēt estoient irritez contre luy: mais il n'est pas raisonnable de s'arrester à ce qu'un procureur & vn solliciteur ont monopolé ensemblement contre l'autorité des Iuges: Et si tel monopole estoit receu pour vn moyen pertinent de requeste ciuile, il ny auroit arrest qui ne fust cassé: ce seroit vne ouuerture trop iniuste & desraisonnable.

Bref apparoiſſant que tout ce que le demandeur apporte encores auourd'huy a esté veu & iugé par Messieurs du Parlemēt de Bretagne, il est impossible de dire qu'il y ait eu aucune surprise ny precipitation, & consequemment il ny a aucune ouuerture de requeste ciuile.

Sur la seconde difficulté concernant la pretenduë nullité, la deffenderesse respond en peu de mots, Que les voyes de nullité n'ont point de lieu en ce Royaume, *ne quidem* contre les sentences des Iuges inferieurs, à plus forte raison ne doiuent elles estre receues contre les arrests.

L'ordonnance ne donne que deux moyens pour se faire restituer contre les arrests, l'un de requeste ciuile, & l'autre de proposition d'erreur: il s'ensuit donc que le moyen de pretē-

duë nullité n'est pas receuable contre l'arrest du mois de Iuillet 1596.

Quãd la voye de nullité deueroit estre receuë (que non) le demandeur en propose vn, Que l'arrest a esté donné hors de la sceance, & le deffendeur respond que durant ces troubles & guerres ciuiles le Parlement a tousiours esté continué, comme estant la continuation necessaire pour le seruice de sa Maieité, & particulierement en l'annee 1596. il y a eu lettres patentes de continuation, lesquelles y ont esté veriffiees.

Il est vray que la veriffication est subsequente à l'arrest, mais elle ne laisse pourtant d'estre bonne, & par les lettres tout ce qui a esté fait au Parlement de Bretagne ayant esté validé, nul ne peut douter que leurs arrests ne demeurent en leur force: comme aussi au cas que sur ce pretexte seul ils fussent cassez, il y auroit vne grande confusion au pays de Bretagne, d'autant que tous ceux qui ont perdu leur procez poursuuiroient la cassation des arrests sur le mesme pretexte.

La continuation a esté faite suiuant le commandement du Roy pour le bien & profit du pays, voire de tout l'estat de ce royaume: Le Roy la ordonnee & auctorisee: d'abondant il a validé tout ce qui estoit fait: Et partant de poursuiure aujour-d'huy que l'arrest soit cassé, comme s'il ny en auoit point eu, la poursuite est iniuste.

Si le demandeur eust estimé qu'apres la sceance la puissance des Iuges fust finie, il deuoit le declarer, il ne la pas fait, au contraire il a volontairement procedé pardeuant eux au mois de May & de Iuin lesquels sont hors des sceances: il s'ensuit donc que luy mesmes a recogneu qu'ils estoient Iuges, & consequemment que les arrests qu'ils ont dōnez ne peuuent estre reuoquez en doubte.

Tous les habitans du pays de Bretagne lesquels estoient en l'obeissance du Roy l'ont ainsi recogneu, de dire que apres ceste recognoissance publique auctorisee par les lettres patentes du Roy, le demandeur puisse seul donner ouuerture à la cassation d'un si grand nombre d'arrests, lesquels sans doubte seroient cassez par la mesme raison, sur laquelle il poursuit la cassation

de celuy dont il s'agist entre les parties il ne seroit pas raisonnable.

Par la disposition vulgaire du texte, *in l. barbarius Philippus*, les iugemens donnez pour vn esclau, incapable & indigne de la fonction d'un moindre des Magistrats, sont confirmees, pour la bonne foy & l'erreur de ceux lesquels procedoient volontairement deuant luy, *quanto magis* est il raisonnable de confirmer les arrests donnez par vne compagnie souueraine dont la puissance a esté recognüe par tous les habitans du pays confirmee & authorisee par les lettres patentes du Roy: Cela ne peut receuoir difficulté quelconque.

Pour vn autre moyen de nullité le demandeur propose qu'il auoit recusé aucuns des Iuges, à quoy il a esté respondu.

Ad extremum il en propose vn autre, fondé sur ce que aucuns d'une autre sceance ont assisté au iugement du procez: & la responce est prompte, qu'il ny a point de loy ny d'ordonnance en ce royaume, par laquelle il soit deffendu aux Iuges d'une sceance d'assister en vne autre sceance, & d'auoir des voix deliberatiues pour le iugement des procez lesquels y sont iugez.

Il aduient assez souuent que les Iuges d'un semestre du Conseil se treuuent au iugement des procez en vn autre semestre: Voire les Conseillers des Cours de Parlement autre que celle de Paris y assistent: de vouloir que des arrests soient cassez, sous ce pretexte il y auoit de l'iniustice.

Il ny a donc apparence quelconque aux requestes ciuilles ny en la voye de nullité pretendüe par le demandeur, & quand il faudroit iuger la cause au fonds, tout ainsi que s'il ny auoit point d'arrests, elle n'est pas meilleure de la part du deffendeur, d'autant que tout le fondement de sa demande consiste sur deux moyens.

L'un que feu Messire Loys de Lur pere du demandeur ne les auoit peu allier au preiudice de l'institution contractuelle qu'il auoit faict par son contract de mariage, en vertu de laquelle tous ses biens auoient deslors esté acquis au demandeur son fils.

Et l'autre qu'en les vendant & alienant feu Messire Jean de Lur son pere auoit esté enormement lezé, voire de plus d'outre moitié de iuste prix.

Aupremier la deffenderesse respondoit, comme il est tres-veritable que l'institution contractuelle n'a point empesché que feu Messire Loys de Lur pere du demandeur ne disposast librement de ses biens, d'autât qu'un heritier vniuersel de tous les biens presens & futurs, quoy qu'il le soit par contract est tenu des faicts, promesses & obligatiōs de celuy auquel il succede, *si quidem hæredis nomen iuris est & referri debet in tempus mortis*: c'est la deffinition du mot vulgaire *hæreditas*. in *l. nihil aliud est. & l. hæreditas. D. de verborum significat.* & le texte in *l. hæreditas. D. de acquir. rer. domi.* dit elegamment que *hæreditas non hæredis personam sed deffuncti sustinet.*

Sile contract de mariage contenoit vne institution ou donation particuliere, & non pas de tous les biens, il y auroit quelque subiect de soustenir que au preiudice de telle institution ou donation celuy qui a institué ou donné ne peut ny vendre ny aliener: Mais quand l'institution ou donation est vniuerselle de tous les biens presens & futurs, nul n'a iamais douté que celuy qui la faicte ne puisse librement disposer, pourueu que ce soit sans fraude: *Imo* tel heritier contractuel vniuersel, est censé & réputé comme heritier testamentaire ou ab intestat, subiect au payement de toutes les debtes & autres charges hereditaires, tout ainsi que le donataire vniuersel des biens presens & futurs y est obligé, ainsi qu'il est décidé, & les Docteurs le traitent in *l. omnes. §. Lucius. D. de his quæ in fraud. credito.* Ou plustost c'est vne maxime indubitable en droit que la donation vniuerselle de tous biens presens & futurs est nulle & ne vault rien, *l. stipulatio hoc modo concepta. D. de verbo obligat.* qui est cause que pour les conseruer aucunemēt, ceux lesquels les ont fauorisees pour les soustenir, ont resolu que tels donataires vniuersels n'auoient pas plus de priuilege que vn heritier subiect aux debtes de l'heredité, in *l. fin. C. de pact. scilicet* d'autant que ne restant aucune chose dont celuy qui donne puisse disposer, les Iuriscultes ont estimé que c'estoit en effect vne

interdiction iniuste & desraisonnable : Et que d'ailleurs il ny a homme qui ne fust trompé, d'autant que telles donations estans cachees, ceux qui auroient contracté de bonne foy se trouueroient en fin trompez & pipez par ceux lesquels auroiēt fait semblables donations, l'institution contractuelle n'est en effect autre chose qu'une donation, il s'ensuit donc, qu'elle est nulle, & ne vaut rien non plus.

Encores y a il vne raison pertinente, pour monstrier que le Conseil soubs la correction ne si doit aucunemēt arrester, scauoir qu'elle n'a point esté insinuee, la deffenderesse est bien d'accord que lors de ceste institution cōtractuelle, dont le demandeur se veut preualoir & qui est de l'an 1552. la rigueur des insinuations n'estoit pas si grande qu'elle a esté despuis l'ordonnance de Moulins faicte en l'an 1566. Mais il faut aussi que le demandeur confesse qu'il y en auoit deux : L'une de l'an 1539. & l'autre de l'an 1540. & par lesquelles toutes les donations deuoient estre insinuees sur peine de nullité: & quoy que pour le regard des heritiers l'ordonnance ne fust pas gardée, & que les donations demeurassent en leur force, si est-ce toutesfois que pour le regard des creanciers elles estoient iugees nulles & de nul effect, a faute d'insinuations, n'ayant pas esté trouué raisonnable de les confirmer au preiudice de ceux lesquels sur la iuste ignorance de semblables donations le plus souvent estoient cachees & latitees auoient contracté de bonne foy.

Il y a encores vne particuliere, à laquelle soubs correction il ny a point de responce, que le demandeur a pris & recueilly tous les biens, & principalement tous les meubles de feu Messire Loys de Lur son pere, dont il a disposé comme il a voulu, qu'il a prins & accepté son heredité apres son deces, & mesmes qu'en ceste qualiré il a intenté ce proces, & consequemment que nul ne peut doubter qu'il ne doie respondre, & qu'il ne soit garend de tous les contrats qu'il a passez. C'est la maxime vulgaire, *quem de euctione tenet actio, eundem agentem repellat exceptio* : Puis qu'il a recueilly tous les biens de feu Messire Loys de Lur son pere, & qu'il a repris les procez intentez de son viuant,

uant, il est impossible de nyer qu'il ne soit son heritier, non pas seulement contractuel, ains *ab intestat*, à tout le moins pour le regard des biens meubles & acquests qui luy appartenoiert. Et s'il disoit qu'ils tombent aussi en l'institution contractuelle en laquelle tous les biens tant meubles qu'immeubles sont cōpris, la deffenderesse ne craindra point de repeter que telle institution est nulle & ne vault rien, & que au pis aller elle doit estre reiglee *ad instar* des donataires vniuersels tenuz & obligez des promesses & obligations de ceux auxquels ils ont succédé.

Elle adiousterà que si telles institutions contractuelles comprenoient les meubles & acquests, sans que les creanciers peussent rien demander sur iceux, il aduiendroit que ceux qui les font pourroient prendre de l'argent par tout, & en faire de grandes acquisitions pour les asséurer à leurs enfans heritiers contractuels, piper & affronter ceux lesquels de bonne foy auroient contracté avec eux, qui est du tout iniuste & defraisonnable

Feu Messire Loys de Lur ayant vendu au feu sieur de Pontac les terres de Salles, Belin & Beliet, & en ayant receu les deniers, nul ne peut doubter qu'il ne les ait employez aux affaires & commodité de sa maison & que entre autres les meubles & obligations qu'il auroit n'en eussent esté acheptez. Si le demandeur en eust fait vn bon & loyal inuentaie, il s'en fust trouué beaucoup plus que ne valent les terres de Salles Bellin & Beliet: ne l'ayant pas fait & au contraire ayant tout pris comme seul fils & heritier vniuersel, & en ayant disposé comme il a voulu, nul ne peut doubter qu'il n'ayt faict acte d'heritier legitime, & consequemment qu'il ne soit tenu en ceste qualité de garentir toutes les alienations faites par son pere.

Au second moyen concernant la pretendue lezion, il y a vne fin de non receuoir tres-pertinente, que les lettres de rescision n'ont pas esté obtenues dedans les dix ans, cela se iustifie par les dattes, estant le contract de vente du 3. May 1563. & les lettres par le demandeur obtenues en rescision ne sont que du mois de Feurier 1581.

Il y a plus, & cecy est sans responce, que tant s'en faut que de.

dans les dix ans feu Messire Loys de Lur se soit pourueu pour faire casser ce contract : que au contraire tant luy que la Dame sa femme l'ont confirmé par deux autres subsequents dés 31. Iuillet 1571. & 23. Mars 72.

Il est vray que le demandeur a pareillement obtenu lettres pour estre restitué cõtre ce contract du mois de Iuillet 1571. Mais elles sont de l'année 1594. 23 ans apres & consequemmēt hors des dix ans apres lesquels la restitution n'est en sorte quelconque receuable.

La deffenderesse sans preiudice des fins de non recevoir, sur lesquelles requiert luy estre fait prealablement droit s'uyuāt l'arrest de reglement, representera sommairement les moyens par le deffendeur cy deuant aleguez & iugez par deux diuers arrests.

1 Qu'il estoit dans le temps de restitution seduifant quelque moys du seruice & absence de Loys son pere, lors du siege de la Rochelle.

2 Qu'apres le decez d'iceluy en l'an 73, il estoit demeuré myneur de 25. ans si que le temps ne luy auoit couru

3 Que certain bail de ferme fait par la deffenderesse pour la somme de mil liures en l'an quatre vingts dix iustifioit la lezion.

4 Qu'il estoit heritier & donataire contractuel de feu Loys son pere lequel n'auoit au preiudice de la donation & institution contractuelle, peu vendre ny aliener.

A quoy la deffenderesse luy auroit respondu.

1 Que ce pretendu seruice & absence volontaire n'auoit empesché le cours de la prescription, ayant ledit Loys en ce mesme temps la intenté & poursuiuy plusieurs proces.

2 Que la pretendue mynorité n'est non plus considerable, par ce que par le testament de Loys & infinis actes, il est iustifié que la mere du demandeur estoit sa tutrice, & en ceste qualité geré, intenté & poursuiuy diuers proces: que d'ailleurs il estoit resolu en droit que la prescription commencee, cõtre le maieur couroit contre le myneur *l. amilius largianus ff. de min. 25. an.*

3 Pour la lezion, que les baux d'affirme desdites terres faits es

annees 46. 53. 55. 57. 59. 62. & 66. deuant & lors de la vente (auquel temps il se faut regler pour l'estimatiō des biens) qui estoit de quatre a cinq cens frans en tout, monstrent le contraire.

4 Loys mesmes vendeur la recogneu & par acte produit au proces, accordé l'esterilité des terres & reuenu d'icelles qu'il disoit pouuoir estre lors de cinq cens frans par an pour le plus.

Or puis que pour verifïer vne lezion, il faut auoir esgard au temps de la vente desdites terres qui furēt l'an 63. vendues dix-huict mil trente trois frans, estans de reuenu de cinq cens il ny peut par consequent auoir lezion quelconque.

Et pour la verifïer encores auiourd'huy (que les biens ont accreu & augmenté depuis trente & trêre cinq ans que la vente est faite du quadruple) il faudroit qu'elles s'affermassent plus de quatre cens cinquante escus pour le moins, & si encores a present les biens nobles & en tout droict de Iustice ne se vendent en Bourdellois qu'au denier 16. 18. & 20. pour le plus.

Ioinct & cecy est sans response, qu'outre l'augmentation du pris, les acquisitions qui ont esté faites ausdictes terres, par la deffenderesse de plusieurs rentes & beaux deuoirs dont les cōtracts sont aussi produicts sont aussi considerables.

Pour le dernier point touchant la qualité d'heritier, il y a esté respondu cy dessus & la cause de l'alienation est pour chose iuste & necessaire, & ne peut le demādeur desnier qu'il n'aye fait acte d'heritier simple, & en ceste qualité s'estre preualu des debtes actifs de Loys son pere, mesmes de soixante arpents de terre, dont il iouyst prouenus des biens gratuits faits a Loys, par le feu Roy Charles en l'an soixante douze, & encores qui plus est d'une plus grāde partie de deniers prouenus des droits & pretensions sur le Marquisat de Fronsac, reseruez par Loys par son contract de mariage, & neantmoins depuis par luy vendus ainsi qu'il resulte des cottes FF. & GG. de la production.

Apparoissant donc l'equité de ceste cause, auoir esté recogneu & iugee par deux diuers arrests contradictoires de l'an 95. & 96. en faueur de la deffenderesse, la poursuite du demādeur est iniuste & les fins de non receuoir contre luy proposees, trespertinentes & peremptoires.



